

IKren kontrako epaiketa Parisen

Polizia eta lekukoen agerpenak Bidarten kontrakoak izan ziren

Defentsak akusazioaren puntu ilun asko azpimarratu zituen atzoko saioan

Baigorri 1982ko martxoaren 19an gertatu bi CRSen hilketa zehaztu zuten atzo Parisen. Antoine Comte abokatuak hortzez eta haginez akusazioaren elementuen desegiten aritu zen. Polizia eta lekukoen agerpenak Filipe Bidarten aurka metatu ziren nahiz bere aurkako erabateko ziurtasunik ez nabaritu.

L. ETXEZAHARRETA / PARISE

Jaki Boyer eta Bernard Rousarie bi CRSen hilketaren afera luzaz zehaztu zen atzo egun guztian. Polizien deklarapen zehatzak agertu ziren, bereziki Gerard Fabries, Baionako PJKoa eta Roger Boslerenak, hau duela 10 urte bertako buruzagi zena eta gaur egun suprefeta koordinatzailea delarik.

Bi poliziek gertakarien eta inkestaren berri eman zuten, agertuz nola Bankako bide bazterrean harrapatu zuten zaku barneko abisa berezi batengatik Bidarti buruz susmoak joan ziren: aurreko abenduaren 3an bere etxean egin zen miaketan abisa berdinak aurkitu baitziren. Argitu zuten ere nola garai horretan abertzale mugimendua Poliziak zehazki zaintzen zuela eta berehala susmagarri zela.


Inkestak agertu zuenez hiltzaileen autotik hurbil harrapatu zakuan aurkitu urpekari nabalaren eskekgailuan, 'Velcro' banda zati bat harrapatu zuten Bidarten etxeko martxoaren 21eko bigarren miaketan. Rousarie zauritutako poliziak, hil baino lehen, Boslek zioenez, baita bere emazteak ere, tiro egin zuena Filipe Bidart izan zela ziurtatu zuten.

Arratsaldeko une pizua zen Valerie Boizilie Montaigu 27 urteko hazpandarrak Bidart ezagutu zuelarik auzitegian ziren bost epaituak zutitu ondoren. 1982ko martxoaren 18an, Kanbon bere leiho azpiko aparkalekuan egon zen autoaren gidaria Bidart zela zioen. Auto hori erabili zen 19ko atentatuan ihes egiteko.

ABOKATUEN BORROKA ZEHATZA

Poliziak ekarri ziurtasunen aurka gogorki borrokatu ziren abokatuak, eta bereziki Comte, lekukoak zehazki eta luzaz galdezkatuz. Kontraesan asko jalgi ziren atzo egun guztian.

Lapurtutako R4L autoko gidariaren aulkia osoki atzeratua



IK erakundeak iaz burutu zuen atentatueta bat.

BOB

zen, jabeak 2 metro ukanez. Valerie Boizilie omen ezagutu Bidartek 1,68 metro ukanez abokatuek zioten ezin zela gidaria izan, Bankako bidean aurkitu zelarik aulkia berdin baitzen. 1982an lekukoak zalantzak zituela, eta 1992an ez duela batere azpimarratu zuten baita ere.

Labanaz adituak mintzatu ziren eta ziurtatu egin zuten autotik hurbileko zakuan aurkitutako eta Bidarten etxekoa berdinak zirela. Kontraesanak zeudela esan zuten abokatuek, Danjeon koronelak zioelako eskekgailu bat eskas zela. Bestalde, honen aurkitzeko

eta Poliziak ofizialki eskuratzearen arteko 12 orduetan zaku barnekoari gertatutakoaz susmoak badaitezkeela agertu zuten.

Bordelen arma erosten edo Parisen *talkman* baten eskuratzea Bidart joan zela susmoak Poliziak agertu ondoren Poliziak gorputzak analisarazi zituen. Bidarten sinaduraren antza zutela esan zuten adituek, baina abokatuek agertu zuten lapurtutako nortasun agiria jabea Antonio Perezen ondoan ez zela alderatu. Yann Chocq-ek esan zuen Boslek gaizkile bat, Kiss izenekoa, ia erabili zuela Mouescaren aurka

eta honen deklarapen faltsuaz baliatu. Perezek, ia Justiziarekin zerikusirik duena molde berean aldi honetan erabilia izan daitekeelako susmoa aipatu zuen.

Abokatuek salatu zuten baita ere Batallon Vasco Españolen pistaren abandonatzea. Honek Bar Hendayais ostatuko hilketa 1980. urtean egin zuen. Filipe Bidartek berriro goraki salatu zuen martxoaren 20ko 'IKren erreibindikapena' faltsua zela.

Abokatuek jakileen zehaztasun berriak eskatu zituzten eta aste ondarra baino lehen lekukotasun berriak gehi daitezke.

Clinton, EEBBetako lehendakari

EAJk «positibotzat» jo duen bitartean HB eszeptiko da Clintonen garaipenaz

BILBO

Euzko Alderdi Jeltzaleak «positibotzat» jo zuen atzo Bill Clinton hautagai demokratak Estatu Batuetako hauteskundetan lortutako garaipena. «Errepublikarrek Francoren diktadura onartu eta demokratek baztertu zutenetik, sintonian izan gara demokratekin» esan zuen Iñaki Anasagasti EAJko bozeramaileak.

Clintonen «erakargarritasun politikoa» azpimarratu ondoren, EEBBetako ekonomia berpizteko beharra aipatu zuen Anasagastik «betidanik nazioarteko lokomotora izan baita». Ildo beretik, begi onez ikusi zuen esta-

tubatuaren kanpo politika gutxi aldatzea «kezka egoeretan aldaketa gogorak ez dira onak eta».

Aldaketa bakarra European hedatutako tropen murrizketa izango da euskal diputatuaren ustez eta horrek Europari «autonomia eta jarduteko ahalmena» emango diola esan zuen.

EEBBek protekzionismoa indartzen badute «Moneda Batasunaren benetako garrantziaz jabetzeko balioko liguke», Anasagastiren esanetan.

HB: «ALDAKETARIK EZ»

Reaganek hasi eta Bushek jarraitu zuen «politika neoliberalaren porrota» azaltzen du Bill Clintonen garai-

penak, Herri Batasunaren iritziz. Politika honek Erresuma Batuan Thatcherrekin amaitu zuela eta orain EEBBetan gauza bera gertatu dela gogora ekarri ondoren, Espainian ildo beretik temati jarraitzea egotzi zion indar aberztzaleak PSOEko Gobernuari prentsa agiri batean.

Dena den, HBk ez du uste EEBBetako Gobernuaren politikan aldaketarik izango denik. «Etxe Zurian errepublikar 'gogorak' ordezkatzeko Bill Clinton gazte 'demokrata' jartzeak Estatu Batuetako Administrazioaren jarrerak aldatuko dituela pentsatzea fiktizioa eta huts galanta da», zioen Herri Batasunak.

Bizkaiko Diputazioko auditoriak «akats ugari» erakutsi du

I.U. / BILBO

Bizkaiko Diputazioak eginiko barne auditoria batek «prozedura akats ugari» utzi du agerian, nahiz eta «aurkitutako irregulartasun gehienak prozedura akats gisa har daitezkeen eta ez garrantzizko ilegaltasun modura» azaldu.

Iñaki Goiri Hazienda eta Finantza Saileko diputatuak aditzera eman zuenez, Diputazioak barne auditorian 1990eko kontratazio txikiak, eta 500.000 pezetako erosketak hartu zituen aintzat. Goirik «Diputazioa legeak bete daitezkeen lehen interesatua» dela berretsi zuen. Akats administratiboak premiari egotzi zizkion behin eta berriz.

Berba egiteko txanda heldu zenean EE, EA, PSOE eta EAJko batzarkideek ez zuten galderarik egin. PPkoak Goiri bertan egotea eskertu ondoren, Diputazioak bere kontuetan «Zesarren emaztea bezalakoa» izan behar duela esan zuen «zintzoa izateaz gain itxura ematea» alegia. Carlos Rodriguez Herri Batasunako ordezkariak esan zuen 1991ko azaroaren 26ko datako auditoriaz gain, badagoela beste bat urriaren 16koa. Honetan «indarrean dagoen legalitatea betetzeko orduan zenbait hutsune» aipatzen da.

LABeko abokatu bat hilabeteko arrestatzera zigortu dute

GASTEIZ

Alonso Lopez Gil, LAB sindikatuko abokatu hilabeteko arrestatzera zigortu dute Goardia Zibileko bi kideri aurre egiteagatik. Bi goardia zibilak Lopez Gil atxilotzera joan ziren bere etxera paisanoz jantzita eta akreditaziorik erakutsi gabe, eta bultzada eta ostiko bidez saiatu zen goardia zibilei jarkitzen. Fiskalak eta abokatuak absoltzioa eskatu zuten epaiketan, eta lau hilabeteko arrestatzea akusazio partikularrak. LABek kondena salatu du, «batetik lesio delitutik libre uzten dutelako, eta bestetik hilabeteko arrestatzea jarri goardia zibilei jarkitzeagatik».